

# 1. Statuto de Tutmonda Esperantista Junulara Organizo

La teksto estas valida ekde la kalendara kaj asocia jaro 2016.

*nemarkita = teksto kopiita senŝange el ĉapitro "Statuto" de malnova Regularo pri TEJO.*

*rozkolora = aldonita por strukturigi la dokumenton*

*verda = aldonita por kompletigi minimuman enhavon de asociaj statutoj laŭ Nederlanda juro.*

*flava = ŝovita el alia ĉapitro de la malnova Regularo pri TEJO*

## ĈAPITRO 1

### CELOJ KAJ AGADO

#### 1. Establo

(1) TUTMONDA ESPERANTISTA JUNULARA ORGANIZO ("TEJO") estas per tiu ĉi statuto establita kiel asocio.

(2) La asocio havas sian sidejon en Rotterdam, Nederlando.

(3) La asocio estas establita por nedifinita daŭro.

#### 2. Junulara sekcio de UEA

(1) TEJO estas la junulara sekcio de UNIVERSALA ESPERANTO-ASOCIO ("UEA"), internacia organizo ekzistanta kun jura personeco laŭ la leĝoj de Nederlando.

(2) TEJO estas sendependa organizo.

#### 3. Celoj

La celoj de TEJO estas:

- (i) disvastigi la uzadon de la internacia lingvo Esperanto;
- (ii) kontribui al la evoluo de la Esperanta kulturo;
- (iii) agadi por la solvo de la lingva problemo en internaciaj rilatoj kaj faciligi la internacian komunikadon;
- (iv) plifaciligi la ĉiuspecajn spiritajn kaj materiajn rilatojn inter la homoj, sendepende de diferencoj rilate al nacieco, raso, sekso, religio, politiko aŭ lingvo;
- (v) helpi la junularon havi aktivan rolon en konstruo de socio inkluziva, internacia, interkompreniĝa kaj rajtrespekta;
- (vi) kreskigi inter siaj membroj fortikan senton de solidareco, disvolvante ĉe ili la komprenon kaj estimon por aliaj popoloj;
- (vii) plibonigi la konojn kaj organizaajn kapablojn de siaj aktivuloj kaj instigi ilian kulturen evoluon; kaj

(viii) liveradi junajn fortojn al la Esperanta movado.

#### **4. Agado**

(1) TEJO aplikas en sia agado metodojn, kiuj respondas al la interesoj de la junularo.

(2) La agado de TEJO konsistas precipe el:

(i) informado en junularaj medioj pri la lingva problemo en internaciaj rilatoj kaj pri ĝia solvo per Esperanto;

(ii) praktika utiligo de Esperanto je la servo de la junularo kaj informado pri tio en junularaj medioj;

(iii) okazigo de kongresoj, konferencoj, seminarioj kaj aliaj kunvenoj; kaj

(iv) instigado al la membroj de TEJO aktive partopreni en la Esperanta movado.

## **ĈAPITRO 2**

### **AGADPRINCIPOJ**

#### **5. Neŭtraleco**

(1) TEJO kontraŭas diskriminacion rilate al nacieco, raso, sekso, seksa orientiĝo, handikapeco, religio, politiko, socia deveno kaj lingvo.

(2) TEJO estas sendependa de ĉiu ajn partio.

(3) TEJO estas neŭtrala pri aferoj nerilataj al ĝiaj celoj.

#### **6. Esencaj kondiĉoj**

Por la agado de TEJO esencaj kondiĉoj estas:

(i) bonaj internaciaj rilatoj; kaj

(ii) respekto de la homaj rajtoj tiaj, kiaj ili estas difinitaj en la Universala Deklaracio de Homaj Rajtoj kaj aliaj internacie rekonataj instrumentoj.

#### **7. Lingvo**

La sola oficiala lingvo de TEJO estas la internacia lingvo Esperanto tia, kia ĝi estas difinita de:

(i) sia Fundamento,

(ii) la verkaro de sia iniciatinto Ludoviko Zamenhof; kaj

(iii) la ĝenerala lingva uzado sub kontrolo de la Akademio de Esperanto.

## **ĈAPITRO 3**

### **SEKCIOJ**

## **8. Landaj sekcioj**

(1) TEJO instigas al junaj uzantoj de Esperanto en ĉiu lando formi sin en organizon por aliĝi al TEJO kiel landa sekcio.

(2) La minimumaj kriterioj por landa sekcio estas jenaj:

- (i) ĝi kunigas tra sia lando junajn uzantojn de Esperanto;
- (ii) ĝi subtenas la celojn de TEJO;
- (iii) ĝi estas aŭ aparta asocio aŭ integra parto de landa asocio aliĝinta al UEA;
- (iv) ĝi estas laŭorde organizita;
- (v) ĝi estas vaste malfermita al junuloj, sen ekskluzivoj pro nacieco, raso, sekso, seksa orientiĝo, handikapeco, religio, politiko, socia deveno aŭ lingvo;
- (vi) membreco en ĝi estas libervola; kaj
- (vii) ĝi estas demokratie gvidata.

(3) Krom en esceptaj kazoj, TEJO ne havas pli ol 1 landan sektion en ĉiu lando.

## **9. Fakaj sekcioj**

(1) TEJO instigas al junaj uzantoj de Esperanto, kiuj interesiĝas pri aparta fako, formi sin en organizon por aliĝi al TEJO kiel faka sekcio.

(2) La minimumaj kriterioj por faka sekcio estas jenaj:

- (i) ĝi kunigas tra la mondo junajn uzantojn de Esperanto, kiuj interesiĝas pri la koncerna fako;
- (ii) ĝi estas simpatia al la celoj de TEJO;
- (iii) ĝi estas aŭ aparta asocio aŭ integra parto de faka asocio aliĝinta al UEA;
- (iv) ĝi estas laŭorde organizita;
- (v) ĝi estas vaste malfermita al junuloj, sen ekskluzivoj pro nacieco, raso, sekso, seksa orientiĝo, handikapeco, religio, politiko, socia deveno aŭ lingvo;
- (vi) membreco en ĝi estas libervola; kaj
- (vii) ĝi estas demokratie gvidata.

(3) Krom en esceptaj kazoj, TEJO ne havas pli ol 1 fakan sektion por ĉiu fako.

# **ĈAPITRO 4**

## **MEMBROJ**

## **10. Membroj**

(1) La individuaj membroj estas:

(i) la individuaj membroj de UEA, kiuj aĝas ne pli ol 29 jarojn je la komenco de la jaro.

(2) La aligitaj membroj estas:

(i) la aligitaj membroj de UEA, kiuj aĝas ne pli ol 29 jarojn je la komenco de la jaro.

(3) La asociaj membroj estas la membroj de la unuopaj landaj aŭ fakaj sekcioj:

(i) kiuj aĝas ĝis inkluzive 29 jarojn je la komenco de la jaro;

(ii) kiuj ne estas individuaj aŭ aligitaj membroj; kaj

(iii) por kiuj la koncerna landa aŭ faka sekcio pagis kotizon egalan al la kotizo por aligita membreco de UEA.

**(4) La membreco estas persona kaj ne transdonebla.**

**(5) La membreco finiĝas:**

**(i) Je komenco de nova jaro, post kiam eksvalidiĝas unu el la kondiĉoj kiuj difinas membrecon;**

**(ii) Post peto de membro;**

**(iii) Je morto de la membro.**

## **11. Patronoj kaj honoritoj**

(1) La Patronoj estas tiuj, kiuj kontribuis al la financoj de TEJO laŭ kriterioj de TEJO difinitaj.

(2) La honoritoj estas la Honoraj Prezidantoj kaj Honoraj Membroj elektitaj de TEJO.

## **12. Eksigo**

1. Aliĝinta asocio aŭ individua membro, kiu evidente kontraŭlaboras la celojn de TEJO, morale aŭ materie damaĝas ĝin, aŭ ne kontentige plenumas siajn devojn al ĝi, povas esti eksigita el la Asocio.
2. Estas kompetentaj la Estraroj de UEA kaj de TEJO kune pri la eksigo de individuaj membroj, kaj la Komitato de TEJO pri la eksigo de aliĝintaj asocioj, patronoj kaj honoritoj de TEJO.
3. Individuaj membroj eksigitaj de la Estraroj rajtas apelacii al la Komitato de UEA kaj al la Komitato de TEJO.
4. Post dujara nemembreco, eksigita asocio rajtas peti permeson denove aliĝi. Pri tio decidas la Komitato de TEJO.
5. Post dujara nemembreco, eksigita individua membro, rajtas peti permeson denove aliĝi. Pri tio decidas la Komitatoj de TEJO kaj UEA.

## **ĈAPITRO 5**

### **ORGANOJ KAJ REPRESENTADO**

## **13. Ĉefaj organoj**

(1) La ĉefaj organoj estas la Komitato kaj la Estraro.

(2) La Komitato konsistas el:

- (i) la komitatanoj A, nomumitaj de la unuopaj sekcioj;
- (ii) la komitatanoj B, elektitaj de la individuaj membroj;
- (iii) la komitatanoj C, elektitaj de la komitatanoj A kaj B;
- (iv) la estraranoj.

(3) La Estraro konsistas el maksimume 9 estraranoj, inter kiuj estas la Prezidanto, la Ĝenerala Sekretario, la Kasisto kaj unu ĝis tri Vicprezidantoj.

(4) La estraranoj estas elektitaj de la komitatanoj A, B kaj C.

(5) La anoj de la ĉefaj organoj aĝas ne pli ol 30 jarojn je la komenco de la jaro, en kiu ili estas nomumitaj aŭ elektitaj.

(6) Prezidanto ne rajtas ofici dum pli ol du sinsekvaj oficperiodoj kaj je la fino de la dua oficperiodo devas retiriĝi el la prezidanteco por almenaŭ unu oficperiodo.

#### **14. Reprzentado**

(1) La Asocion reprezentas la Prezidanto en juraj kaj nejuraj aferoj kaj subskribas la ĉefajn dokumentojn.

(2) La Vicprezidantoj laŭbezzone anstataŭas la Prezidanton.

(3) La Estraro povas nomumi reprezentanton, kiu reprezentas la asocion ene de limoj difinitaj en la nomumo.

#### **15. Asembleo**

(1) La asembleo (ĝenerala membrokunveno) de TEJO estas la kunsido de la Komitato.

(2) Ĉiu membro de TEJO elektas sian reprezentanton en la Komitato laŭ demokratia maniero.

(3) La Reglamento de TEJO difinas la proceduron de la elekto de la Komitato.

## **ĈAPITRO 6**

### **STATUTŜANĜOJ**

#### **17. Amendo**

(1) Ĉi tiun statuton povas amendi nur la Komitato de TEJO.

(2) Se la amendpropono koncernas artikolojn kiuj difinas la rilaton kun UEA, la amendon devas tamen aprobi kaj la komitato de TEJO kaj la komitato de UEA.

(3) La Komitato traktas amendon nur se:

(i) En la alvoko al kunsido de la Komitato estis anoncita statuta amendpropono;

(ii) Unu semajnon antaŭ la kunsido la teksto de la amendpropono estis taŭge disponigita al la Komitato;

(4) Amendpropono estas aprobita de la Komitato nur se:

(i) Almenaŭ du trionoj de la ĉeestaj komitatanoj voĉdonas favore al la propono, kaj krome:

(a) La ĉeestaj komitatanoj reprezentas almenaŭ du trionojn de la Komitato, aŭ

(b) en antaŭa kunsido de la Komitato la sama amendpropono ne estis aprobita pro neplenumo de punkto (ii), kaj la ĉeestaj komitatanoj en la sekva kunsido de la Komitato reprezentas almenaŭ duonon de la Komitato.

## **ĈAPITRO 7**

### **MALFONDO**

#### **18. Decido pri malfondo**

(1) Pri malfondo de la asocio povas decidi nur la Komitato.

(2) La Komitato traktas proponon pri malfondo de la asocio same kiel proponon pri amendo de la statuto.

#### **19. Likvido**

(1) Post decido pri malfondo de la asocio, ĉiuj rimedoj de la asocio transiras al UEA.